



Iesus apparoit à ses Disciples peschans en la mer, qui miraculeusement leur fait prendre grande quantité de poissons.

INSI que Pierre avec ses compagnons estoient peschans en la mer de Tiberiade, n'ayans rien pris toute la nuit, le matin Iesus s'apparut à eux sur la riue, & ils ne le connurent point; & leur dit, Enfans, auez-vous quelque chose à manger? & ils répondirent, Non; & il leur dit, lettez vos rets à la dextre de la nasselle, ce qu'ils firent, & ne pouuoient tirer les rets pour la multitude des poissons qui estoient pris. Le Disciple que Iesus aymoît, dit à Pierre, C'est le Seigneur: alors Pierre vestit sa robbe, & se ietta en la mer; mais les autres Disciples y vindrent avec la nasselle, & ayans tirez les poissons, virent de la braize apprestée, & du poisson mis dessus, & du pain; & Iesus leur dist: Venez & disnez. Iesus donc prit du pain & du poisson, & leur en bailla: c'estoit desia pour la troisième fois qu'il s'estoit apparu à eux depuis qu'il fut resuscité des morts. Or peu apres il dit à Pierre par trois diuerses fois, M'aimes-tu? Pierre répondit à chacune des fois, Ouy Seigneur: Et Iesus luy dist par deux fois, Pais mes agneaux, & vne fois, Pais mes brebis; & luy declara ce qui luy deuoit aduenir.